



Minggu, 22 Oktober 2023
Ogen: Keluaren 2:1-4



Njagai Agina



Itengah tekanen, ancamen keamanan reh beratna, i je me Johebet (nande Meriam) ndatken ide guna nelamatkan anakna. Paksa e, pemerintahen Mesir ermomo guna munuh anak si kitik denga. Telu bulan i buniken, tapi i bas reh belinna anak e kepeken lanai terbuniken. Guna si e, turah i bas perukuren kai banci ilakoken guna nelamatkanca. Ibahanna me sada keranjang i bas batang rengo nari, ilapisi alu damar segelah la bengket lau ku bas. Itamakenna anak e ku bas ingan si enggo isikapken e, dengen i tamakenna deher dukut si mbages i tepi Lau Nil. Ambah si e isuruh Meriam ngenehen agina e bas ingan si ndauh nari. Tujunna segelah kai pe si jadi erberita ia man nandena. Tuhu i dauh-dauh nari Meriam tedis ngenehens, iperdiatekenna kai jadi man agina. Meriam ertanggung jabap ngelakoken tugasna. Iperdiateken dengen ipernehenna. Situhuna i bas mperdiateken ras ngarak-ngarak agina, dirina pe ikut terancam, kune tereteh man pemerintah banci saja ia pe iukum. Tapi, erkiteken kepatuhenna man orang tuana, bage pe kekelengenna nandangi agi si kitik denga, dahikenna alu tutus. Meriam jadi kakak si terandalken, perbahanenna e erbahanca agina selamat janah ndatken posisi si lebih baik ku wari-wari si lebena.

Selaku nande, kita pe iajuk guna ngasup njagai se isi jabunta terkhusus anak-anakta arah tetap mperdiateken (ngenehen). Mereken perhatian subuk paksa ndeher bage pe dauh-dauh nari. Perhatin (ngenehen bas ingan si dauh nari) mbelin kal ngaruhna man siniiperdiateken e. Njagai ia bas ancamen si lit dengen nuduhi dalam si benar. Guna si e iperluken me sikap peka, megermet nandangi kalak siniperdiateken. Mereken pusuh man bana segelah dahin mperdiateken e labo jadi beban tapi erkiteken palas kekelengen. Dahin si dahiken alu palas kekelengen ngerehken keriahen dengen menahang kap.

☞ “Kekelengen njemba kita guna njagai se isi jabu”